

Nafarroak eta EAEk aurki sinatuko dute batzorde iraunkorra sortzeko akordioa


Otano eta Ardanza baikor agertu dira, zailtasunak gainditu dituztelakoan

Nafarroaren eta EAE-ren artean batzorde iraunkor bat sortzeko elkarriketak aurrera doaz eta behin-betiko akordioa laster lortuko da. Hala jakinarazi zuten atzo Javier Otano eta Jose Antonio Ardanza lehendakariak. Batzorde iraunkorrari nortasun juridikoa emango dion formula hitzarmena izango da seguruenik.

Ana Unanue / Iruñea

EITB Nafarroa osoan hartu ahal izateko hitzarmena sinatu ondoren, baikor agertu ziren Otano eta Ardanza, Nafarroa-EAE batzorde iraunkorra eratzeko zailtasunak gainditu direlakoan. «Jakina desadostasunak eduki ditugula. Zailtasunik izan ez bagenu, esan nahiko luke sinatu beharrekoak ez duela garrantzi handirik, eta ez da hala. Zailtasunak egon dira, baina oinarriko puntuetan ados gaudenez gainditu egin ditugu, eta ia amaieran gaude. Aurki aurkeztu ahal izango dugu behin-betiko akordioa», esan zuen Otanok.

Antzera mintzatu zen Ardanza. Honek adierazi zuenez, elkarriketak oso aurreratuta daude eta laster lortuko da erabateko adostasuna. Lehendakariak oso pozgarri iritzi dio horri: «Duela urtebete nekez pentsa nezakeen halako konpromezu serio bat hartzeaz egongo ginela, Historiak orain arte ez digulako horrelako prozesu batean aurrera egiteko aukerarik eman». Ildo beretik, aurreko legegintzaldietan Nafarroako eta EAEko gobernuak bien arteko lankidetzara eragotzeko borondatea erakutsi zutela, baina gaurdaino borondate hori gauzatzeko aukerarik ez dela



Javier Otano eta Jose Antonio Ardanza Iruñean, komunikabideen aurrean.

JOXE LACALLE

Pirinioetako Lan Elkartea Iruñean dago bilduta

PIRINIOETAKO Lan Elkartek batzar orokorra egingo du gaur Iruñean. Lan elkarte honek biltzen dituen herrialdeetako ordezkariak —Javier Otano, Nafarroakoa; Jose Antonio Ardanza, EAEkoa; Marc Forne, Andorrakoa; Jacques Valade, Akitaniakoa; Santiago Lanzuela, Aragoikoa; Jacques Blanc, Languedoc-Rosellokoa; Ilibert Cautrecasas, Kataluniakoa; eta Michel Aujoulat, Midi-Pirinioetakoa— atzo arratsaldean eduki zuten lehen elkarriketa, eta gero afari ofiziala.

Gaurko batzar orokorrari Otanok emango dio hasiera,

bera baita gaur egun Pirinioetako Lan Elkarteko lehendakaria. Ondoren, Elkarteko batzordeek egindako lanari buruzko balantzea aurkeztu eta etorkizunerako erronkak aztertuko dituzte, horien artean Pirinioak izeneko programaren garapena. Programa horren bidez administrazio publikoek haratago joan nahi dute, indar ekonomikoak eta sozialak ere inplikatzeko baitute helburu.

Datozen hilabeteetan batez ere komunikazio, formazio, ikerketa eta kultur arloak landu nahi ditu Pirinioetako Lan Elkartek.

egon azpimarratu zuen Ardanzak.

Hego Euskal Herriko bi gobernuen artean batzorde iraunkorra eratzeko formula juridikoa hitzarmena izango da seguruenik. Hitzarmenak Madrilgo Kongresuaren oniritzia beharko du. Ardanzaren idurikoz, ez dago beste aukerarik.

Jaurilaritzako buruak erabateko errespetua agindu zuen Nafarroaren nortasunarekin, horregatik abertzale gisa dituen ametsi eta helburu politikoei uko egin gabe, ordea. «Nazionalista naiz, baina beste ezeren gainetik demokrata, eta argi daukat nafarrei dagokiela Nafarroaren geroaz erabakitzea», adierazi zuen Ardanzak. Horri lotuta, garai batean abertzaleek Nafarroan bestelako jarrera eduki zutela aitortu zuen jeltzaleak. X

Urralbururen fidantza 35 milioira jaisteko eskatu du fiskalak

«Alarma soziala» nabarmen gutxitu dela uste du

Efe / Iruñea

GABRIEL URRALBURU Nafarroako Gobernuak lehen-dakari ohiari kartzelatik libratzeko jarri zioten fidantza —ehun milioi pezeta (lau milioi libera)— 35 milioi pezetara jaisteko eskatu du kasu horretako fiskalak. Fiskalak horrela erantzun dio Urralbururen abokatuak hura libre utz zezaten egin zuen eskaerari. Antonio Aragonen abokatuak ere haren askatasuna eskatu zuenean berdin erantzun zuen fiskalak. Hala ere, azken hitza kasuko epaileak izango du.

Fiskalaren iritziz, Nafarroako gobernuakide izandakoen espetxeratzeak eragin zuen alarma soziala nabarmen gutxitu da. Haatik, libre utziz gero oraindik ihes egin dezaten arriskua dagoela uste du, biek ondasunak dituztelako Suitzan eta oraingoz ez dutelako inolako azalpenik eman ondasun horien inguruan. Fiskalak «oso larritzat» jo ditu Urralbururen eta Aragonen kontrako akusazioak, baina aldi berean azpimarratu du ez dela zilegi behin-behineko espetxeratzea mugarik gabe luzatzea.

Urralburu eta Aragon iazko abenduaren lehenean espetxeratu zituzten, kohetxo delituaz akusatuta. Sumarioan ageri denez, agintari sozialista ohiek diru komisioak jaso zituzten Nafarroako Gobernuan egon ziren urteetan. X

Nafarroako Parlamentuak ez du euskaraz egin nahi

A. U. / Iruñea

NAFARROAKO Parlamentuak euskararen inguruan duen jarrera salatu zuten atzo Patxi Zabaleta eta Adolfo Araiz HBko foru parlamentarioek.


Zabaletari eta Araizi, HBko beste bi parlamentariari bezala, zigor espedientea zabaldu zieten martxoaren 27ko plenoan euskal presoan argazki batzuk ateratzeagatik. Hilaren 2an zigor espedienteari buruzko agiriak euskaraz bidaltzeko eskatu zuten HBkoek, tramite guztiak euskaraz egin nahi zituztela argudiatuta. Foru Parlamentuak, baina, ezezeko erantzuna eman die.

Zabaletaren idurikoz, Parlamentuak «mesprezatu» egingen du euskara, eta elebitasuna ez da inondik inora errespetatzen. «Parlamentuak modu barreagarrian ari da jokatzen, eta bere jarrera erabat salagarria eta oso larria iduritzen zaigu», aipatu zuen leitzarrak.

Horrez gainera, zigor espediente bera ere barreagarria dela esan zuen Zabaletak. X

Jaurilaritzak eraikuntza berria du

Joan den asteartean inauguratu zuten Jaurilaritzaren eraikuntza berria. Tunel baten bitartez aurreko eraikuntzari lotuta dago, eta 7.700 milioi pezetara gastatu dira guztira. Bi mila funtzionario inguru hartuko ditu Lakua IIk. Jadanik Osasun Sailekoak bertan dira, eta laster Ogasun Saila, Hezkuntza eta Hirigintza egongo dira. Lanek uste baino bi urte gehiago iraundute, Joseba Zuboia Lehendakariatzako sailburu ohiak, proiektua aurkeztu zuenean, 1993. urterako amaituta egongo zela iragarri baitzuen.



JOSEBA OLALDE